

Porta di Logia ta dal habri

‘Dia di Mazoneria’ riba diasabra 14 di september 2013

ORANJESTAD -- E “Orde van Vrijmetselaren in Nederland” of Ordo di Mazon nan Hulandes ta declara diasabra 14 di September 2013 como e segundo “Dia Nacional di Mazoneria”.

Mazon ta kiko esey ta? Kiko bo ta ripara di nan, den e bida diario? E miembro nan ta uza Mazoneria pafor di logia? Tin hopi storia tocante di Mazoneria pero pa hopi hende toch e ta keda un gran secreto. Ya desde un cantidad di aña e Mazonnann Hulandes a desea di trece mas claridad riba nan actividadnan. P’esey cu riba diasabra 14 di september 2013 durante e ‘Dia di Mazoneria’ tur Logia Hulandes ta habri

nan portanan pa publico en general. Na Aruba tin tres Logia Hulandes: “El Sol Naciente”- “King Solomon”- “The Middle Chamber” y tambe un Logia Venezolano – “Hiram”. Pa es nan interesa e ta un oportunidad unico pa cera conoci cu Mazoneria, e biaha aki tur e logianan di Aruba lo ta representa na e edificio di Logia “King Solomon” cu ta situa na Dadelstraat # 27 na Dakota di 10:00 di mainta pa 2:00 di merdia.

Mazoneria conoce hopi tradicion, pero tambe ta algo actual. Loke cu es nan cu no ta miembro sa di e hermandad, ta mayoria parti di e tradicion, e ritual y e simbolonan, mane-

ra e “passer” y “square”. Pero hopi biaha e Mazonnann no ta bini hunto pa un ritual, pero pa un anochi di instruccion caminda un charla ta wordo teni y un intercambio di idea ta sigi. Discusion ariba politica y religion ta wordo evita, pero esaki no ta nifica cu e topiconan aki di nos sociedad ta taboe. Purba gana un otro pa bo punto di bista no ta e meta. Mazonnann ta pone nan opinion banda di otro y no contra di otro.

Mazoneria ta pa profundisa den spiritualidad. Asina un hende ta siña conoce su mes mas mihor, p’asina e persona por aporta den construccion di

un miho comunidad. “Mehora mundo pero cuminsa cu bo mes”, por ta e slogan tambe. Mazoneria ta reconoce e balor inmenso di e personalidad humano, e igualdad di tur ser humano, e derecho di cada ser pa independientemente busca e berdad y cada hende su responsabilidad pa su mesun actuacion pa haci of no.

Transicion - desaroyo – ta esencial den Mazoneria. E caminda pa mehora bo mes, pa e Mazon ta e caminda of e biahe simbolico pa e Luz. Masone-ria ta kere cu cada ken na su manera sabi cu tin mas cos entre tera y shelo cu ta move humanidad, un asina yama principio superior. Cada Mazon ta

liber pa segun su mesun bista pa completa esaki y pon’e manera cu e ta desea. Esun ta kere den un Dios, e otro den e combinacion di forsa di naturalesa y e otro den e ser supremo den su mes of den su consensi.

Mazoneria pues no ta un religion, pero e hermandad si ta spiritual. Bo ta interesa den Mazoneria? E portanan di Logia “King Solomon” ta hanchi habri riba diasabra 14 di september durante e “Dia di Masoneria” di 10:00 am pa 14:00 pm. Pa mas informacion wak e website www.dagvandevrijmetselarij.nl y <http://www.vrijmetselarij.nl> □